

Regional News Unit AIR Aizawl  
Monday, August 12, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Dengue hri leng avangin tun thlengin Mizoramah mi 8 an thi tawh.
- Champhai District khaw hrang hrang a sawhthing a tam avangin sawhthing chingtute'n harsatna an tawk tan.
- Prime Minister Narendra Modia chuan nimin khan thlai thar tam chi chi 905 a tlangzarh.
- Paris Olympci 2024 chu nizan khan ropui taka khar a ni a. A pumpuiah US chuan pakhatna a ni.



### DENGUE

Dengue hri leng avangin tun thlengin Mizoramah mi 8 an thi tawh.

Health and Family Welfare hnuai a State Vector Borne Diseases Control Programme (SVDBCP) hotute hnen atanga thu dawn danin kumin July thla khan Aizawl Tuikual veng ami chu Ebenezer hospital-ah Dengue vangin a thi a. Kum 2022 khan mi 5-in nunna an chan a, nikum khan 2 an thi bawk. Kuminah hian Dengue hri kai ni a inringhlel mi 3,186 sample endik zinga 228 chuan he natna hi an vei tih hmuhchhuah a ni a. An zinga mi 126 te hi Aizawl district ami an ni a, Lunglei district-ah Dengue vei hmuhchhuah 94 an awm bawk a, district dangah chuan awm ve bawk mah se, Aizawl leh Lunglei district hi Dengue hri kai hmuhchhuah tam berna an ni. Kum 2013 kha Mizorama Dengue natna kai hmuhchhuah hmasak ber kum a ni a. Kum 2022 kha hri kai hmuhchhuah tam kum leh nunna chan pawh an tam ber kum a ni a. Nikumah pawh khan Dengue hri vei hi an tam tho a ni.

Hetih lai hian thosi seh avanga natna kai darh chi tho Chikungunya avangin Mizoramah nunna chan an la awm lova, kumin chhungin he hri kai inringhlel mi 94 sample lak zingah hri kai hmuhchhuah an awm lo bawk. Hri kai rinhlelhte hi Lunglei district ami vek an ni. Kum 2018 khan Chikungunya hri kai hi Mizoramah a hmasa ber atan hmuhchhuah a ni a, mi 10-in he hri hi an kai a. Kum 2020 khan Chikungunya hri kai mi 67 hmuhchhuah a ni a, kum 2022 khan mi 53 hmuhchhuah leh a ni. Lunglei district-ah he natna hri kai hmuhchhuah hi a tam ber a ni.

SVDBCP hotute'n an sawi dan chuan nikum khan malaria hri vei hmuhchhuah a tam hle a, mi 18,005 in sikserh natna hi vei-in an zinga 13-in nunna an chan phah a. Kum 2022 nena khaikinikunah sikserh natna vei hi za zela 76 chuangin a pung a ni.



### CIVIC BY-POLL

Aizawl Municipal Corporation (AMC) bial 6-na ruak hnawhkhat tura candidate 3-te tana inhnudawhna hun hnunng chu vawiin thleng hawn a ni.

AMC bial 6-na a inthlanna hi kil thum atanga inchuh tur an ni a. BJP candidate Pu Chawngmingthanga, ZPM candidate Pu H. Lalremtluanga leh MNF leh Congress-in an thlawp independent candidate Pi Lalrinfeli te hi tun thla ni 22 a AMC bial 6-na inthlann (by-election)-ah an inkhing dawn a.

He lai biala inthlan that a tulna chhan hi kum 2020 AMC inthlanna a thlan tlin MNF candidate Pu John Zosangliana Ralte a thih vang a ni a. MNF leh Congress chuan party candidate siam lovin Pu John Zosangliana Ralte thih san, a nupui Pi Lalrinfeli independent hi an thlawp a ni. AMC bial 6-na by-election a vote tlate hi August ni 26 khian chhiar a ni dawn a ni.

<><><>

GINGER

Champhai District khaw hrang hrang a sawhthing a tam avangin sawhthing chingtute'n harsatna an tawk tan.

Champhai District a khaw hrang hrang VCP leh YMA hruaitute hnen atanga thu dawn danin, kumin hian kum dang zawng aiin kuthnathawktuten sawhthing an ching uar a. Khaw thenkhatah chuan a chi man a to deuh avangin dukhawp ching thei lovin a chi chhuahna tur tawk an ching a. In awm zawng zahve ai a tam sawhthing ching awmna khua te pawh a awm nual a. Champhai khawpui atanga thingtlang lama sawhthing chingtu pawh an awm nual bawk. Champhai District Horticulture Officer Pu Zonunsanga hnen atanga thu dawn danin, sawhthing chingtute'n an sawhthing a tam tan chho mek tih thu hi an dawng nual tawh avangin sawhthing tam venna beihpui thlak tum a ni.

Naktuk, Thawhlejni khian Aizawl-a Horticulture Directorate-ah Mizoram pum huap District Horticulture Officer, Addl. District Horticulture Officer, Block Horticulture leh Technical Staff zawng zawng sawhthing tam chungchang zirho tura kohkhawm an ni a. Zirtawpni atangin sawhthing tam beihpui thlak turin fehchhuah runpui an huaihawt dawn a ni.

Tun dinhmunah Sawhthing tam hi hmuh tan ni mahse, a la tam nasa lutuk rih lo niin an sawi a, Loneitu thenkhat chuan Horticulture Department a mithiam te thurawn angin damdawi chi hrang hrang hmangin an sawhthing te an kap mek a ni.

<><><>

ASF UPDATE

Nimin khan African Swine Fever (ASF) vawk pulhri leng avangin district pali-ah vawk 23 a thi.

Animal Husbandry and Veterinary department hotute hnen atanga thu dawn danin Aizawl, Lunglei, Serchhip leh Hnahthial district te vawk thi report a awm a. Heti hian kumin February ni 9-a Champhai district Leithum khua a ASF vawk pulhri avanga vawk thi an hmuhchhuah leh atang khan vawk pulhri avangin vawk 9,322 a thihna a ni a. Tun dinhmunah khua/veng 203-ah vawk pulhri hi a leng mek a ni.

ASF vawk pulhri a darh zel lohna atan nimin khan vawk 68 suat a ni a. Kumin chhunga vawk suat tawh zat hi 17,389 a tling tawh a ni.

<><><>

MOS


Mizoram tlawha lo zin Union Rural Development minister Pu Kamlesh Paswan chuan Inrinni khan Aibawk BDO pisa a tlawh.

Pu Kamlesh hi BDO Conference Hall, Aibawkah RD official te, khawtlang hruaitute, RD Dept. hnuai ruahmanna hrang hrang hmang tangkaitute'n lo hmuakin, inkawmhona hun hlimawm tak an hmang a.

He inkawmhona hun hi Rural Development Secretary Pu Zarzosanga'n kaihruaiin, Aibawk BDO Pi Esther Leihang chuan Aibawk RD block hmalakna hrang hrang leh hmachhawp mek te a sawi a ni.

Inkawmhonaah hian thu sawiin Union Minister chuan Prime Minister Narendra Modi hian India Hmarchhak state te kawng hrang hranga tihhmasawn hi a tum hle a, kawng hrang hrangin hmasawna rahbi pawh tuk mek a ni, a ti a. Chuvangin ani pawhin a Ministry chan hnuaiia hmasawna hnathawh mek te dinhmun leh eng harsatna nge an tawh tih te hre turin a hmuna rawn kal a nih thu a sawi a. Minister chuan Aibawk RD Block hnuaiia heng Scheme hrang hrang :Pradhan Mantri Awaas Yojana-Gramin (PMAY-G) Pradhan Mantri Gram Sadak Yojana (PMGSY), MGNREGA, Deen Dhayal Upadhaya Grameen Kaushalaya Yojana(DDU-GKY), MzSRLM leh ruahmanna dangte viltu leh buaipuitu official te chu chipchiar takin an hmalakna te zawtin, hmang tangkaitute hnenah pawh harsatna an neih te zawtin an inkawmho a ni.


Hemi hnu thimhlimah khan Raj Bhavan-ah Pu Kamlesh Paswan chuan larsap Dr Hari Babu Kambhampati a kawm nghal a. Larsap hnenah hian Mizoram rawn tlawhtu Union Minister chuan a rawn kal chhan te, Mizoramah a cham chhunga a hun hman dan tur te hrilh a. Larsap leh Minister te hian thingtlangmite'n Rural Development Department hnuaiia hnathawh hrang hrang leh hmalakna an tangkaipui thute sawiin an ngaih pawimawh thil dang pawh an sawi dun a ni.



BANGLADESH


Bangladesh sawrkar lailawk hruaitu Mohammad Yunus chuan sakhua leh hnam tlem zawkten beih an tawk chu a dem thu a sawi. Pu Yunus-a chuan an ram chhunga lungawilohna lantirtu langsar ber zirlaite chu Hindu, Christian leh Busshist chhungkuaten harsatna an tawh loh nana veng him turin a chah a ni.

Nimin khan Bangladesh khawpui Dhaka leh hmarchhak lam khawpui Chattagram-ah te Hindu sangchuangin lungawilohna lantirin an pungkhawm a. Tunhnaia an ram buaina avanga beih an tawk leh an chenna in, sumdawna leh temple te tihchhiat anih duhlohna an lantir a. An chungang pawikhawihntute chungah rang zawka hremna pek an phut thu leh parliament seat zaa 10 hauhsak an phtu a, sakhaw tlem zawk vuantute venhimna dan siam an phut bawk a ni. Hindu lungawilo pungkhawmte hi Muslim mi engemawzatin an tawiam a, an zingah hian zirlaite pawh an tel a ni.



PM AGRI

Prime Minister Narendra Modia chuan nimin khan thlai thar tam chi chi 905, sik leh sa harsa mil tur leh tha bik tura tihdanglam chu India Agricultural Research Institute, New Delhi-ah a tlangzarh. Pu Modia chuan loneitute thumchak zel turin sawrkar chuan hma ala zel tih a sawi a. Loneitute leh scientist te nen inkawmin an thlai chi thar tlangzarh tak chuan nasa takin loneitute a puih a beisei a ti a. An sum sen zat pawh a tlakhniam phah ngei a rin thu a sawi a. Hetianga thlai chi tha an siam chhuak thei chu scientist te pawh chhuanawm atih thu a sawi bawk a ni.



PRESIDENT

Paris Olympic 2024 chu nizan khan ropui taka khar a ni a. A pumpuiah US chuan pakhatna a ni a, Gold 40, silver 44 leh bronze 42 lain a vaiin medal `126 an la a. China chuan dawtin gold 40, silver 27 leh bronze 24 lain avaiin medal 91 an la a. Japan chu pathumna niin gold 18, silver 19 leh bronze 16 lain medal 45 an la a ni. Kumin intihsiakah hian India chuan silver pakhat, bronze panga nen avaiin medal paruk a la a. A pumpuiah 71 na a ni.

Olympic kharna programme hi Stade de France ah hman a ni a. Mi sing 8 chuang an pungkawm a. India tan Olympic Medallist PR Sreejesh leh Manu Bhaker te chuan ram aiawhin hnam puanzar an keng a ni.

Kum 2028 Olympic hi US khawpui Los Angeles ah nghah a ni ang.

